

Quotas da dunnas per il cussegl federal?

Las dunnas ston tschertgar alianzas sur blers cunfins ora

■ (anr/vi) Bliers èn fin uss stads encunter da fixar il dumber da dunnas en la politica. Suenter avair pers in sez en il cussegl federal, èn cunzunt las dunnas tuttenina pli stgauradas per quotas. Ma ina nova iniziativa da quotas n'è per il mument nagin tema. «Jau hai battì per l'iniziativa da quotas», di Chiara Simoneschi (pcd/TT). Ella è presidenta da la cumissiun federala per dumondas da dunnas. Era sch'ins beneventia uss tuttenina quotas, fissi in suicidi politic, sch'ins lantschass puspè in'emprova, manegia Simoneschi. Ella fa cunzunt attent ch'il pievel ha refusà fitg cler l'iniziativa da quotas.

Flausas da dunnas veglias

Nagina haja prevesì ch'i dettia suenter ils 10 da december be ina dunna en il cussegl federal. «Jau hai fatg tut mes pussaivel per che Ruth Metzler vegnia reelegida», di Simoneschi. «E suenter han tuts pensà che Christine Beerli vegnia elegida sco segunda dunna.»

Che quai n'è betg capità è stà ina gronda surpraisa u perfin in schoc. «Jau pudess ma desperar», di Simoneschi. Las partidas empermettian adina sontgamain ch'ellas promovian dunnas. Sch'ins vesia quant pauc ch'i vegnia fatg...

Ma la terrada dals 10 da december muntia era ina schanza. Ella haja sveglia las dunnas giuvnas. Las studentas pensian ozendi ch'ellas hajan entamaun lur carriera. Ellas sa futrian da l'egualità. Pir cura ch'ellas daventian mammas, percorschian ellas quant paucas schan-



Cussegliera nazionala Franziska Teuscher pretenda 30 pertschient dunnas en las etaschas autas da societads d'acziyas.

zas ch'ellas han sin il martgà da lavur. Ils 10 da december haja avertì ils eglas a las giuvnas. Ellas vesian uss quant rumpai-vlas che las schanzas èn e che l'egualità na saja betg sulet in tic da las «dunnas veglias».

Tegnair ensemen

Las deputadas tessinaises tegnian ensemen en dumondas da famiglia e d'egualità. En il parlament a Berna na funcziuneschia quai anc betg. Durant la davosa legislatura hajan las dunnas collavurà be tar la pornografia cun uffants. Simoneschi crai che quai sa midia en questa legislatura. Pliras tematicas da dunnas sajan sin la glista da tractandas. Per quellas stoppian las parlamentarias sa metter ensemen, p. ex. congedi da maternità, revisiun da l'AVS, canortas d'uffants, cassa da pensiun.

Simoneschi avertescha dentant: «Na tut las dunnas politiseschan per dunnas.» I dettia adina da quellas che lavurian encunter ils interess da dunnas.

Siglientar la paraid da glas

Era Franziska Teuscher (verda/BE) è s'engaschada per quotas da dunnas en la politica. «La finala datti per tut quotas», di la cussegliera nazionala ed ella dumbra si: per partidas, per regiuns, per confessiuns. Pertege betg per dunnas? Uss fiss segir avant maun ina euforia per quotas, manegia ella. Ma quai sa midia svelto puspè. Perquai na hai nagin senn da lantschar ina segunda iniziativa da quotas per gremis politics.

Teuscher ha dentant fatg in'intervenziun per quotas en ils cussegls d'administrasiun da societads d'acziyas. Lezzas n'han tant sco naginas dunnas en las etaschas autas. Teuscher pretenda uss che las societads stoppian avair 30 pertschient dunnas en la direcziun. En il cader mesaun sajan las dunnas numdamain represchentadas fitg bain. Il palantschieu da glas impedeschia dentant che las dunnas cuntanschian era las direcziuns ed ils cussegls d'administrasiun. Quest palantschieu da glas vul Teuscher siglientar cun sia intervenziun.

Tancar forza

Davart ils 10 da december di la politichera: «Jau avev pensà ch'i existia in consens per las dunnas en il parlament.» Ella n'avev mai cartì che la Svizra crodia anc ina giada enavos en in temp cun be ina dunna en il cussegl federal.

Quai mussia ch'ins na possia anc betg serrar ils biros d'egualità. Teuscher di che tut las dunnas duessian far part dad uniuns, forums u raits ch'uneschian dunnas. Gist dunnas che vivian en vischnancas pli pitschnas sajan avisadas d'esser en uniuns u forums, sch'ellas fan politica. En quests forums sentian las dunnas ch'ellas na sajan betg persulas. «Jau sun stada en bleras cumissiuns e gremis politics nua ch'i veva sulet umens», di Teuscher. En ils forums da dunnas haja ella sentì ch'i dettia bleras dunnas che battian era tut persulas encunter las medemas resistenzas – exact sco ella. «Quai dat forza.»